

# ZAKON O IZMJENAMA I DOPUNAMA ZAKONA O POLJOPRIVREDI

## Član 1.

U Zakonu o poljoprivredi ("Službene novine Federacije BiH", br. 88/07) član 28. mijenja se i glasi:

"Mjere novčanih podrški u poljoprivredi su poticajna sredstva iz budžeta Federacije Bosne i Hercegovine koja obuhvataju poticaje proizvodnji i plaćanja u sklopu mjera strukturne politike. Mjere podrški proizvodnji provode se putem modela poticaja proizvodnji, a plaćanja u sklopu mjera strukturne politike provode se putem modela podrške dohotku, modela kapitalnih ulaganja, modela ruralnog razvoja i modela ostalih strukturnih podrški.

Mjere novčanih podrški u poljoprivredi provode se u skladu sa Strategijom poljoprivrede i ovim Zakonom do iznosa sredstava planiranih budžetom za te namjene za određenu fiskalnu godinu. Prioriteti, struktura ulaganja po pojedinim modelima iz stava 2. ovog člana i uvjeti koje moraju ispunjavati poljoprivredna gazdinstva da bi ostvarila podršku utvrdit će se Zakonom o novčanoj podršci u poljoprivredi i ruralnom razvoju Federacije BiH, odnosno zakonima o novčanim podrškama u kantonima."

## Član 2.

U članu 29. st. 4., 5., 6. i 7. mijenjaju se i glase:

"Korisnik-klijent dužan je vratiti novčana sredstva dobivena na osnovu netačnih podataka i/ili ako dobivena sredstva nenamjenski utroši zajedno sa zateznim kamatama u visini koja je zakonom propisana u roku od 30 dana od dana donošenja rješenja kojim je utvrđeno postojanje netačnih podataka ili nenamjensko trošenje dobivenih novčanih sredstava.

U slučaju iz stava 4. ovog člana korisnik-klijent može podnijeti novi zahtjev za sticanje prava iz stava 1. ovog člana po isteku tri godine, računajući od dana povrata novčanih sredstava uključujući zakonske zatezne kamate u cjelini, a na osnovu rješenja kojim je federalni ministar poljoprivrede ili poljoprivredni inspektor naredio korisniku-klijentu prava povrat sredstava.

Korisnici-klijenti moraju čuvati dokumentaciju na osnovu koje su ostvarili novčana sredstva najmanje tri godine računajući od dana dobivanja sredstava.

Svi korisnici-klijenti koji podnose zahtjeve za novčane podrške moraju biti upisani u registre iz čl. 46. i 49. ovog Zakona."

## Član 3.

U članu 36. u stavu 3. iza alineje 4. dodaje se nova alineja koja glasi:

"- izdaje, produžava i oduzima odobrenje za samostalan rad svojih članova (licenca)".

Dosadašnje alineje 5., 6., 7. i 8. postaju alineje 6., 7., 8. i 9.

#### **Član 4.**

U članu 37. dodaje se novi stav 3. koji glasi:

"Poslovi Agronomske komore iz člana 36. stav 3. alineja druga smatraju se javnim ovlaštenjima."

#### **Član 5.**

U članu 43. u stavu 2. iza tačke 2. dodaje se nova tačka 3. koja glasi:

"3. prati izradu i provođenje strategije ruralnog razvoja i štiti i profilira interese ruralnih zajednica u Federaciji Bosne i Hercegovine".

Dosadašnja tačka 3. postaje tačka 4.

#### **Član 6.**

Iza člana 44. dodaje se novi član 44a. koji glasi:

#### **"Član 44a.**

Radi stvaranja povoljnijeg ambijenta za investiranje u poljoprivredi, prehrani i ruralnom razvoju Vlada Federacije BiH osniva garantni fond Federacije Bosne i Hercegovine (u daljnjem tekstu: garantni fond).

Garantni fond olakšava pokretanje investicija poljoprivrednim gazdinstvima (pravnim i fizičkim licima) u poljoprivredi, prehrani i ruralnom razvoju izdavanjem garancija na ime osiguranja cijelog kredita ili dijela kredita koji Razvojna banka Federacije Bosne i Hercegovine i druge finansijske organizacije u Federaciji BiH odobravaju poljoprivrednim gazdinstvima.

Djelatnost, organizacija, zadaci i način finansiranja garantnog fonda utvrdit će se posebnim zakonom."

#### **Član 7.**

Naslov i član 46. mijenjaju se i glase:

"Registar poljoprivrednih gazdinstava i Registar klijenata

Federalno ministarstvo poljoprivrede, vodoprivrede i šumarstva dužno je osigurati tehničko provođenje i funkcioniranje Registra poljoprivrednih gazdinstava i Registra klijenata u Federaciji Bosne i Hercegovine, kao i harmonizaciju i integraciju registara na državnom nivou u skladu sa Odlukom o harmonizovanim registrima poljoprivrednih gazdinstava i harmonizovanim registrima klijenata BiH ("Službeni glasnik BiH", br. 85/07) te pristup podacima iz registra u Federaciji BiH, Ministarstvu vanjske trgovine i ekonomskih odnosa Bosne i Hercegovine. Zahtjev za upis, promjenu ili brisanje podataka iz registra podnosi se nadležnoj općinskoj službi prema sjedištu privrednog društva, zadruga ili drugog pravnog lica i obrtnika, odnosno mjestu prebivališta nosioca porodičnog poljoprivrednog gazdinstva ili prebivališta drugog fizičkog lica, nezavisno o mjestu vršenja poljoprivredne djelatnosti u Bosni i Hercegovini. Podaci iz registra vode se u bazi podataka na elektronski način i obavezno se koriste za provođenje, kontrolu i usklađivanje sistema upravljanja mjerama podrški za poljoprivredu i ruralni razvoj radi poticaja razvoja poljoprivredne proizvodnje i ruralnih područja kao i za potrebe vođenja analitike i poljoprivredne statistike na teritoriji Federacije BiH. Pristup podacima iz registra osigurava se i kantonalnim ministarstvima nadležnim za poslove poljoprivrede, za podatke sa područja svog kantona. Propis o uvjetima, načinu upisa, obrascima, vođenju i brisanju podataka iz registra poljoprivrednih gazdinstava i registra klijenata donosi federalni ministar poljoprivrede, vodoprivrede i šumarstva. Propis iz stava 5. ovog člana mora biti usaglašen sa Odlukom o harmoniziranim registrima poljoprivrednih gazdinstava i harmonizovanim registrima klijenata u BiH."

## **Član 8.**

U članu 47. dodaje se naslov člana i glasi:

"Upis u Registar poljoprivrednih gazdinstava".

## **Član 9.**

Član 49. mijenja se i glasi:

"Klijentima, u smislu ovog Zakona, smatraju se fizička i pravna lica koja žele ostvariti pravo na podrške u poljoprivredi i ruralnom razvoju na teritoriji Federacije BiH i koja se kao takva upisuju u Registar klijenata.

U Registar klijenata mogu se upisati i pravna i fizička lica koja nisu upisana u Registar poljoprivrednih gazdinstava jer ne obrađuju zemljište ili nemaju stoku, ali imaju pravo na određene mjere podrške za poljoprivredu i ruralni razvoj.

Pravo na podršku u poljoprivredi i ruralnom razvoju mogu ostvariti samo lica koja su upisana u Registar klijenata.

Podaci iz Registra klijenata koriste se za potrebe osiguranja kontaktnih informacija u vezi sa isplatama novčanih podrški u oblasti poljoprivrede i ruralnog razvoja."

**Član 10.**

Ovaj Zakon stupa na snagu osmog dana od dana objavljivanja u "Službenim novinama Federacije BiH".

**PREDSJEDAVAJUĆI  
PREDSTAVNIČKOG DOMA  
PARLAMENTA FEDERACIJE BIH**

Safet Softić

**PREDSJEDAVAJUĆI  
DOMA NARODA  
PARLAMENTA FEDERACIJE BIH**

Stjepan Krešić